



曾文正公書札卷十一

致劉星房

敝處書籍太少江西如有殿板初印廿四史敬求代爲購買雖重價不惜也如不能得全書卽購得零種或一史二史三五史十餘史皆可總以初印爲佳後印者則不足取 國朝刻書遠勝前代殿板如十三經廿四史全唐詩圖書集成五經萃室書畫譜之類凡初印者無不精雅絕倫外板如盧雅雨盧抱經黃蕘圃孔龔軒畢弇山孫淵如所刻叢書均工雅可寶卽胡果泉張古愚秦恩復汪孟慈等所刻影宋諸書及秀野草堂韓詩一隅草堂白詩之屬亦皆精絕閣下多藏古書如遇前項書有初

印者敬求代爲購買弟眼蒙非善本書不耐看也

與何廉昉

閣下此次次韻大篇似較上年三疊尤爲卓絕秋長消人四發  
端句何減後有千年自此開也愈唱愈高幾欲去天三尺其謂  
是乎承詢及欲購書目鄙人嘗以謂四部之書浩如淵海而其  
中自爲之書有原之水不過數十部耳經則十三經是已史則  
廿四史暨通鑑是已子則五子暨管晏韓非淮南呂覽等十餘  
種是已集則漢魏六朝百三家之外唐宋以來廿餘家而已此  
外入子集部之書皆贗作也皆剿襲也入經史部之書皆類書  
也不特太平御覽事文類聚等爲類書卽三通亦類書也小學

近思錄衍義衍義補亦類書也故嘗謬論修藝文志四庫書目者當以古人自爲之書有原之川瀆另行編列別白而定一尊其分門別類雜纂古人成書者別爲一編則蕩除廓清而書之可存者曰少矣敝處現無多書江西如有殿板初印十三經廿四史無論或全部或零種均乞代買非初印者則不必買此外嘉道以來所刻諸影宋本書亦祈購覓不惜重價瑣瀆清神不安之至

覆胡宮保

得惠緘知少村將來敝處大約今明日可到蕭公決不能兼統訓韋二軍久畱於徽不惟無益恐生它變當札催其歸來也袁



公餉事可慮之至昨接其報克全椒摺鋪張頗過保獎亦優渠  
於滁州一案全守克公科曰雖出於勢之不得已然終非正辦  
也溧陽失守敝處未緘告作梅一則欲其至益陽少與勾畱一  
則告之無益適以擾其心耳

覆方子白

頃奉惠書并詩二章深情古韻如載幽人之至性以出僕嘗謂  
黃魯直生平倔强自喜從無斂衽溫恭之象而此古風二首頗  
抑抑於繩尺之中不類其平日之作譬如驍將初當大敵亦頗  
內怯國藩素非大敵而閣下此篇亦復循循繩尺重蹈魯直故  
轍又何說也久不爲詩機軸生澀不復奉禽惟希鑒亮聞台從

已至英山卽祈翩然枉駕來宿松敝營作彌月之敘將來贈別之物當以佳書數種相貽左季高先生亦來敝處卽可聯轡以行

致駱籥門中丞

左季翁自領一隊之說侍勸其不必添此蛇足今已作罷論矣渠欲親臨行陣一試膽氣將來或在希菴營中句畱略久亦未可知袁午帥自去冬綰符以來軍威甚振惟餉項日絀朝不謀夕李世忠新克全椒保以提督記名一門兄弟子姪均得優獎管轄一方自爲一種風氣午橋一循克齋舊章終不甚愜人意也

覆胡宮保

昨夕得書及季公所爲碑銘頌又得校定稿本季公文簡重渾括鄙人豈能更有所贊助於其間中有一二字未愜者謹已註出未審有當否侍欲爲丹雘立碑於遇害之所不知英山有巨石可爲碑者否乞一飭查示悉拙作碑記一首抄稿呈台端與季公閱敬求改正并求訪問當日在英山人員情事果否符合記文改定後擬請季公書之或隸或楷皆可但嫌文陋且冗長耳

與李申夫

聞石牌須另起屋子地方并不甚好此間又須略候羅宅靈柩

歸來少爲照料近日勢難拔營胡潤帥亦申前說欲至羅宅弔奠便來一敘擬移至城內公館一住或久或暫尙未定耳前敵氣勢尙壯否深爲系念閣下尙能黎明卽起否不可閒斷一事有恆則萬事皆可漸振無以爲小端而忽之至囑

致張筱浦中丞

羅澹翁靈櫬於二十一日到宿松境其世兄赴江干迎接途次相左俟其歸來乃可扶歸鄉間蕭守帶章訓兩部能在尊處少立功績以爲至幸鄙意猶慮蕭之才力不能統六千人之多又恐章訓兩部難以水乳交融不無過憂敬求台端畱心察看於二者之中如有一弊則不特難以圖功且恐另生事端則不如



飭令西旋請鄂帥分別調度若二弊皆可無虞則仍畱麾下多一兵自多一兵之用也

與彭杏南

到安慶城下紮營宜深溝高壘牆子以落雨不塌爲佳濠溝不必多只要深要斗有一層靠得住反勝於三四層靠不住者每早三成隊站牆子不特防賊來撲且規矩習於平日各弁勇自然人人起早人人不嬾散左路六營望賢表弟與蕭孚泗作主季洪弟於戰陣之事較生不及表弟見得多辦得慣不可過於推讓反致誤事看得的拏得穩卽與信卿作主可也再緩幾日朱南桂來左路便有七營沅弟新添二哨來便有八營兵力頗

厚只要臨陣不忙亂自然百戰百勝

贊李希菴

羅淡公之靈輓到江干昨信詢及台端是否來宿弔奠茲前敵  
兩路進兵閣下恐難遠離也少村英年秀挺自以專心讀書不  
染宦場氣習爲安卽世態人情亦不宜遽令識透早透則漓其  
本質而日趨於薄旣薄而返之醑厚千難萬難當以尊見與潤  
帥商之

與朱雲崖

到安慶城下宜深溝高壘牆子宜講究基址中間宜牽以柴梗  
雖久雨不塌爲妙唐桂生向善做牆子或可令各營效之濠溝

只挖一道宜深宜斗一道果靠得住其好守反勝於二道三道也高橋嶺防運道由閣下力求希帥派數營往紮一月以後宿松又有二營可派赴前敵耳

致羅少村

得來書知已抵喪次應少停住候料理就緒擇日由舟次扶襯至宿城一宿次日至鄉僕出城八里郊迎設席路祭府縣迎畢至城設祭次日均送出城外到鄉後一切布置僕再至鄉恭弔候尊信約期可也喪事重大繁多令兄一人照料不到須擇貴族中親者賢者幫同辦理足下宜親筆寫信再三懇求卽人品或不甚純平日或不甚洽均宜懇求聯絡孝道莫大於收族處

亂世莫大於睦鄰二者尙祈留意宿松黃明府明日再至舟次可熟商也

覆張廉卿

前敵各軍久應進兵前以浙警繼以雨阻未得遽赴頃始分偏安慶桐城兩路猶未能直薄城下地大人眾都未能應弦赴節讀來示所稱先事熟籌乘機迅發云云爲之愧赧援鵲堂筆記牘閱一二卷殊不愜意凡讀書筆記貴於得閒戴東原謂閤百詩善看書以其能蹈瑕抵隙能環攻古人之短也近世如高郵王氏凡讀一書於正文注文一一求其至是其疑者非者不敢苟同以亂古人之真而欺方寸之知若專挾異同某字某本作

某則謂之考異謂之校對不得與精覈大義參稽疑誤者同日而語今觀援鶉堂所記幽通思元二賦多云何云某字後漢書作某是義門校對之字而薑塢鈔謄之也閒觀它卷亦多謄義門語而已無所質正於其閒當時批寫書眉本不以爲箸述之事後人概以編入筆記之內殆非薑塢及惜抱之意若得有識君子披沙簡金非無可采然非大爲淘汰恐無益耳尊作古文著句俱有筋骨曰進無疆至爲欣慰輒就鄙見評隲一二以資互證僕近亦作得文數首都不稱意年老目眊但思多讀古書以補昔日之闕人事紛擾不得如意茲可慰耳

覆胡宮保



得專兵賜書并惠宣紙羊穎敬謝敬謝縱陽已大有備似須待  
懷桐兩軍紮穩後再做迪菴打湖口之法出奇往攻乃能得手  
目下恐未易攻若能攻得敵處必設法守之此破安慶之要着  
自宜竭力以圖但恐難遽攻得耳季公聞其大世兄有病頓動  
歸思公既有來宿之約必堅畱季老在此奉候也

覆李希菴

頃接惠緘并鈔示雲崖一信及尊處覆書敬悉一切國藩前接  
雲崖信請尊處撥三千人於高橋嶺以保後路鄙見亦以爲然  
今讀來書覺尊見更爲妥善蓋貴軍紮青草壩原爲四應之活  
着若分三千人紮高橋嶺則轉呆矣不特目前不能兼顧桐城

且將來北援商固抽此三千人以去反搖動懷甯之軍心應卽遵照卓見無庸分撥至朱李一軍或照尊緘以八千人入駐關內三千人仍畱高橋或以九千人關二千高橋已囑雲崖申夫奉商台端施行淡公忠觀初二登岸初三可至渠家潤帥擬以初五六來宿松會往羅宅弔奠季公及舍九弟均俟潤帥來會後分別赴青草壩等處也

覆彭雪琴

專丁至接手書水師不能遽入內湖必須縱陽打開乃能入湖此鄙人所素知雲崖申夫諸君或未熟悉閣下與厚菴兩君須步步把穩不可因陸兵約會冒險深入致水師或吃虧仍無益

於陸軍也張小浦自今年以來舉動不愜人意所奏事件前後  
矛盾來緘所指各端鄙心亦不以爲然本日接渠咨又以輔丞  
帶訓營三千援剿常州鎮江而令韋志俊帶所部回江濱交厚  
菴調遣此舉尤不妥叶不知輔丞已起程赴常否曾有稟達閣  
下暨厚菴處否蘇州甫得安穩而賊股直趨鎮江金陵大營又  
形吃緊朱雲崖等擬以八千人進紮集賢關內而畱三千人紮  
關外九舍弟曰昨來宿松當卽赴前敵也

致胡宮保

本日侍出城八里接淡公忠櫬申刻入城明日可還鄉也接張  
小浦信金陵大營全陷和張退守鎮江云云大局決裂至此以

後補苴愈難矣接到寄諭令都直夫帶兵赴江北公意定撥何營交之恐賊志不在北竄而在蘇常也

覆胡宮保

得手教并官袁各緘敬悉閣下之意擬圍一城而此外皆作活兵不作呆兵季公之意則並不圍一城概擇便地以紮老營而伺隙抽兵出而鵬剿鄙意謂兩說皆是也特鵬剿須得好將庶遲速遠近悉合機宜耳目下先將都公帶去之兵將派撥定局然後可議此間以進爲防以鵬剿爲進之法至閣下行藏請來宿松面商敬辦一公館頗精潔也

覆李希菴